

IN MUMENTIN PER LA NAUSCHA CONSCIENZA: LA FABRICAZIUN DA CHALZERS EN L'INDIA

da Silvana Derungs

AS ESSAS VUS ERA GIA DUMANDADS, TGI CHE FABRITGESCHA VOSS CHALZERS? CH'IGL N'È BETG IN SIGNUR DOSENBACH U LA DUNNA VÖGELE È BAIN CLER. CH'I DAT LA «LAVUR D'UFFANTS» N'È MEDE-MAMAIN BETG NUNENCONUSCHENT, MA QUAI È USCHÈ LUNSCH DAVENT... PROPI? IN PRODUCT DA LAVUR D'UFFANTS SA CHATTA NUMNADAMAIN TAR ILS BLERS DA NUS MINTGA DI VI DALS PES.

EXPLOTAZIUN DALS PLI PAUPERS

Ozendi èn blers chalzers uschè bunmartgads, e quai betg mo pervia dals materials, mabain era perquai ch'els vegnan producids per gronda part en pajais paupers cun pajas bassas. La consequenza da la produziun orientada al pretsch dal product èn situaziuns insupportablas ord vista dal dretg da lavur: naginas assicuranzas per ils lavurers, abus (era sexual) da las lavureras ed era lavur d'uffants. E lura na dastg'ins era betg emblidar la contaminaziun da l'ambient cun negliger per part mesiras per la proteenziun da quel. Ma adatg: la conclusiun che products chars sajan vegnids producids en bunas cundiziuns socialas na constat betg adina.

L'India posseda il pli grond dumber dad uffants-lavurers da l'entir mund. Las lavurs da quels uffants èn p.ex. lavurs en chavas da crappa, rimnar rument, la producziun da tarpuns ed autras diversas textilias, trair rikschas, lavurar sco emploiads en chasa, la prostituziun ed era la fabricaziun da chalzers. L'industria da chalzers è ina da las grondas industrias d'export da l'India che lascha lavurar in grond dumber d'uffants. Passa 25'000 uffants èn involvids en la producziun da chalzers. In ulteriur pajais da producziun è la China; en Brasilia èn 30% dals emploiads en l'industria da chalzers anc minorens.

MASSIVS PRIVELS PER LA SANADAD

La fabricaziun da chalzers è ina lavur fitg intensiva. Uffants èn participads a las differents lavurs, davent dal preparar las furmas enfin tagliar il muster e cuser ensemen ils chalzers. Per il pli vegnan ils uffants engaschads per metter ensemen e cuser ils chalzers. 80% dals uffants lavuran a chasa per ils furniturs – dis da 14 uras da lavur n'èn nagina raritad.

Tar la lavur intensiva ch'è pajada fitg mal vegn anc il privel per la sanadad: la lavur vegn per il pli fatga en stanzas stgiras e stretgas e quai cun las collas che cuntegnan vapurs malsaunas e donnegiantas. Quella lavur tranter violenza, pulvra e chemicalias maina gia en giuvens onns a problems da respiraziun e malsognas dal lom e da la pel, a cancer ed er a malsognas psichicas. Era betg dad emblidar èn las blessuras – a l'emprima egliada forsa trivialas – cun las guglias da cuser: igl exista semper la ristga da la contaminaziun da la blessura, cunquai che la savida da tractar blessuras è pitschna ed il tractament vegn tralashà.

LESCHAS CUN PAUC EFFECT

Ils ultims onns ha l'India gè ina ferma creschientscha da l'economia, ma tutina existan anc grondas ingiustias socialas. Quai sa basa surtut sin l'appartegnientscha a las castas ed a la schlattaina. Dapi il «Child Labour Act» da l'onn 1986 èsi scumandà en l'India da far lavur uffants sut 14 onns. Exceptà da questa cunvegna è dentant l'agid dals uffants a chasa tar lur geniturs – n'emporta betg, sche quai è lura agid en il tegnairchasa u sin il funs u vi dal taler. Malgrà il Labour Act dumbra la regenza da l'India (populaziun totala: ca. 1.15 milliardas) almain 17.5 milliuns uffants che lavuran (organisaziuns d'agid stiman perfin 40 milliuns uffants tranter 5 e 14 onns). Fin uss èn dentant be 4000 emploiaders vegnids chastiads per avoir cuntrafatg a questa lescha – ils blers cun in chasti pecunar da ca. 7 francs...

funtaunas:

www.ijoem.com

(Tiwari RR. Child labour in footwear industry)

<http://www.aktiv-gegen-kinderarbeit.de>